

Olwaandiko lwa Paulo hali Filemoni Obweébeembezi

Olwaandiko olu, lwaandikilwe ne entumwa Paulo, aha muuntu ogwo akaba naayétwa Filemoni. Neebonwa nka nikwo Filemoni akaba naatuúla omu muzihwa gwa Kolosai (Abakolosai 4:9). Akaba ali omuhíte, na káandi akaba ayina abazáana, weényini akaba ali Omukristu, no omu nzu yoómwe niho baabeele bakoba Abakristu. Paulo na Filemoni bakaba bali abanywáani bazima.

Paulo akaandika olwaandiko olu obuchilo ali omu ibóhelo omu muzihwa gwo okwo Rúumi, omu mwáaka gwa 62 gúti kuluga kuzaalwa kwa Kristu. Akaandika olwaandiko olu habwo omuzáana oómo wo mwa Filemoni, ogwo akaba ayétwa Onesimo. Nichibonwa nka nikwo omuzáana ogwo akatoloka kuluga owa Filemoni. Chilo chimo yaábugana na Paulo. Paulo yaámweegesa Empola Nzima habwa Kristu Yeézu, Onesimo yeékiliza mala yaámuhiindukila Múungu.

Ha buchilo obwo, omuzáana ogwo akaba atoloka kuluga owa mukamawe, kábaabeele bamukwáata bakaba bamuchwaáziika. Mbwénu Paulo akaba naamusiindika Onesimo owa mukamawe ali Filemoni. Niho Paulo kumuha Onesimo olwaandiko amutwaálile Filemoni. Omulwaandiko olwo Paulo akamusaba Filemoni amuzilile engoonzi nko Omukristu muzeenziwe.

Empola

¹ Olwaandiko olu niimbaandikila ínye Paulo, embóhe habwo kwoólekeeela Empola Nzima habwa Kristu Yeézu, niinkwaandikila íwe Filemoni. Ínye no omwiikiliza muzeenzi wéetu Timoteo, nitukwaangalucha íwe engaanzi yéetu no omukózi muzeenzi wéetu.

² Nitumwaangalucha na munyaányeechwe Afia, no omulwaani muzeenzi wéetu Arikipo, hamo na abeekiliza bóona áabo abalikweékobyá omúka yaawe.

³ Embabazi no obuhóolo kuluga hali Isíichwe Múungu, na aha Mukáma Yeézu Kristu, bibe hamo neemwe.

Okusiima no okusaba kwa Paulo habwa Filemoni

⁴ Buli kukusabila, mba niimusíima Múungu,

⁵ habwo kuba niinhulila nka nikwo noozeendelela kumweésiga Omukáma Yeézu no kuzila engoonzi ha batakatíifu* bóona.

⁶ Okwiikiliza kwaawe kukukozile oóbe no obúmo na abáandi. Óobu, niinsaba nka nikwo, obúmo obwo bukole emilimo omuli íwe ha kumanya amazima góona, áago tulikweendelwa kukola omuli Yeézu Kristu.

⁷ Omwiikiliza muzeenzi wéetu, engoonzi zaawe ziimbonesize amanulilwa maháango no kuúngumya muno, habwo kuba osemeliize emiganya ya abatakatíifu.

Paulo naasába Filemoni amuganyile Onesimo

* **1:5 1:5 Abatakatíifu:** Habwo obusoomboozi bwooli osome Obusoomboozi habwa Amagaambo Agagumile.

⁸ Ha bwéecho, no óobu nnyina obuzizi kuluga ahali Kristu bwo kukulagila éecho olikweendelwa kukola, tiínkukola iíntyó.

⁹ Náho, habwe engoonzi mbweene ni kuzima nkusabe, ínye Paulo omunyaampala, káandi embóhe habwa Kristu Yeézu.

¹⁰ Niinkusaba echigaambo chimo, habwa Onesimo.[†] Weényini ni nka mutábani waanze, neenye ndi nke íise, habwo kuba nkamuzáala abone kumwiikiliza Yeézu Kristu, obuchilo naábeele ndi omu ibóhelo.

¹¹ Aho olwa mbele, weényini akaba atakukugasa, náho óobu naakugása íiwe bwooli, no óobu neenye.

¹² Óobu niimmusubya hali íiwe, weényini niwe enfula yaanze.

¹³ Káandi naakaáyeenzile ayikale neenye, kuba abone omwáanya gwo kuúmpweela nka nikwo íiwe óokwo wakuumpweéllile, obuchilo ndi omu ibóhelo habwe Empola Nzima.

¹⁴ Náho tiínkweenda kukola echigaambo choóna chóona íiwe otéena kwiikiliza. Tiínkweenda kukuhátika nka nikwo ompwéele, náho niinyeénda okole ebizima habwe engoonzi zaawe.

¹⁵ Lúundi, Onesimo akaluga owaáwe ha mwáanya muche, kuba oóbe náze káandi buchiile.

¹⁶ Kubaandiza óobu, weényini ti nko omuhálila káandi hali íiwe, náho weényini asaagile omuhálila, na no omwiikiliza muzeenzi wétu we engoonzi. Íinye niimmweénda bwooli, neewe noomweénda

[†] **1:10 1:10 Onesimo:** Ensoonga yaáho no, *óogwo alikugasa kukola echigaambo bunaanka.*

bwooli kusaagáho, byóona nko omuuntu na nko omwiikiliza wo Mukáma Yeézu.

¹⁷ Mbwéenu nu, kábilaaba nooléeba nka nikwo ínye nyina obúmo neewe, omwiinaánkule ogwo nko óokwo waakuunyinaánkwiile ínye.

¹⁸ Na kábilaaba akakuhenela echigaambo choóna chóona, nali noomutoónga echiintu, otoónge ínye.

¹⁹ Ínye nyini Paulo, naáyaandika kwe engalo yaanze nka nikwo, niinkuliha. Tiínkweenda kukugaambila nka nikwo niinkutoónga, habwo kuba kwiingana no kwoólekeelela kwaanze, íwe okachuúngulwa.

²⁰ Óobu, omwiikiliza muzeenzi waanze, onkuúndile echigaambo echi, habwo Omukáma Yeézu. Nuliza omuganya gwaanze nka nikwo omudugu omuli Kristu yaakukozíle.

²¹ Niinkwaandikila aga, ha kuba niinsoom-boókelwa nka nikwo, nooyikiliza. Káandi niinsoomboókelwa nka nikwo, habwi isima lyaawe, nookola kusaaga okwo naásaba.

²² Hamo na ago, ondoongeze aho kwiikala, habwo kuba niintegeza nka nikwo aha kusaba kwéenyu, Múungu naanzúna mbone kwiizáyo okwo.

Empola zo kulaga

²³ Epafra, óogwo abohilwe hamo neenye habwa Kristu Yeézu, naakwaangalucha.

²⁴ Káandi abahálila bazeenzi baanze, Mariko, Aristariko, Dema na Luka, nibakwaángalucha.

²⁵ Niimbasabila embabazi yo Omukáma Yéézu Kristu eébe hamo neemwe mwéena omu myooyo yáanyu.

Endagano Eénsha omu Chiziinza
Portions of the Holy Bible in the Zinza language of
Tanzania: Endagano Eénsha omu Chiziinza (New
Testament+)

copyright © 2024 Wycliffe Bible Translators, Inc.

Language: (Zinza)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

ec04e043-ebb2-5393-a814-029b879f102a